

В ПОНЕДЕЛЬНИК 6-Й СЕДМИЦЫ ПО ПАСХЕ

В НЕДЕЛЮ О СЛЕПОМ. ВЕЧЕРА,

На Господи воззвах: поставим стихов 6: праздника 3, и минеи 3.

Празднику, глас 5-й:

Подобен: Радуйся постников:

Свет всему естеству человеческому, и Око телу мира сего, сый Боже и Слове, и очесем обще, Содетель и Зиждитель познаваемъ: и ныне от смешения брения и плуновения, слепаго неизреченно воочаеши персты Твоими созидающими и брение, и видение: еже и улучив, прежде в рожденных знаемый, солнца отнюд не видя, Тебе Сладкое видит Солнце, зря образ, нас за благоутробие неизреченное Создавшаго.

Удов лишением, и отложением человеческия плотския орудийныя части богатея, прежде слепый от утробы матерни произшедый, яко не быти создание помышляше, очес лишение, из негоже ногама, и множайшая телесе преткновения, еже о камение бываху: иже Тобою и сие богатство стяжав, видит свет мира, и Тебе светов Строителя Бога и Владыку тварем возвещает, и Содетеля всемирнаго.

Усты и душею и умом, от персти Зиждительски и плуновения очес зеницы Давшаго, и общее просвещение, иже прежде слепый исповедаше, тварем всемирнаго Смотрителя и Строителя, за милосердие токмо создания вочеловечившагося, и проповедаше яко Бога Всесильнаго: егоже книжницы ревностно, и еже к ним беседование отнюд не могуще зрети, слепотствующе множае, изгнана от соборища судят, иногда зеницы Давшаго слепому, душевныя и телесныя.

Слава, и ныне: глас 2-й:

Слепый родивыйся в своем помысле глаголаше: еда аз грех ради родительных родихся без очию? еда аз за неверие языков родихся во обличение? домышляюся вопрошати: когда ночь, когда день? не терпята ми нозе каменнаго претыкания: не видех бо солнца сияюща, ниже во образе мене Создавшаго: но молю ти ся Христе Боже, призри на мя и помилуй мя.

На стиховне стихиры воскресны, глас 5-й:

Честным Твоим Крестом Христе, диавола посрамил еси, и Воскресением Твоим жало греховное притушил еси, и спасл еси ны от врат смертных: Славим Тя Единородне.

Стих: К Тебе возведох очи мои:

Покаянен: Господи, согрешая не престаю, человеколюбия сподобляемъ не разумю: победи мое омрачение, едина Блаже, и помилуй мя.

Стих: Помилуй нас Господи, помилуй нас:

Мученичен: **О** земных всех небрегше, и на муки мужески дерзнувшие, блаженных надежд не погрешите, но небеснаго Царствия наследницы бысте, прехвальнии мученицы: имуще дерзновение к Человеколюбцу Богу, миру мир просите, и душам нашим велию милость.

Слава, и ныне: глас 8-й:

Мимоходя Иисус от святилища, обрете человека слепа от рождения, и умиосердився положи брение на очию его, и рече к нему: иди, умыйся в Силоаме: и умывся прозре, славу возсылая Богу. Соседи же его глаголаху ему: кто твои зеницы отверзе, ихже никтоже от зрящих исцелити возможе? Он же возопив рече: Человек Иисус глаголемый, Он ми рече: умыйся в Силоаме, и прозрех. Той есть воистинну, Егоже рече Моисей в законе Христа, Мессию, Той есть Спас душ наших.

По Ныне отпускаеши: и по Отче наш:

Таже отпустительный тропарь, глас 5-й:

Собезначальное Слово Отцу и Духови, от Девы Рождающееся на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим.

[Слава: святаго, аще имать. И ныне: Богородичен во глас тропаря святаго. Аще ли ни: Слава, и ныне, Богородичен, глас 5-й]

Ектения, и отпуст.

В ПОНЕДЕЛЬНИК 6-Й СЕДМИЦЫ ПО ПАСХЕ

НА УТРЕНИ,

На Бог Господь, тропарь воскресен, глас 5-й:

Собезначальное Слово Отцу и Духови, от Девы Рождающееся на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершых славным Воскресением Твоим. [Дважды]

[Слава: святаго, аще имать. И ныне: Богородичен во глас тропаря святаго. Аще ли ни: Слава, и ныне, Богородичен, глас 5-й]

По 1-м стихословии седален, глас 5-й:

Подобен: Собезначальное Слово:

Крест Господень похвалим, погребение святое песньми почтим, и Воскресение Его препрославим: яко совозмоли мертвых от гроб, яко Бог, пленив смерти державу, и крепость диаволу, и сущим во аде Свет возсия.

Стих: Господи, да не яростию Твоею обличиши мене, ниже гневом Твоим накажешь мене.

Вси побдим, и Христа усрящим вернии со множеством елеа, и свечами светлыми, яко да чертога внутрь сподобимся: вне бо дверей обретаясь, бездельно Богови воззовет: помилуй мя.

Стих: Дивен Бог во святых Своих, Бог Израилев.

Мученичен: Господи, чаши Страсти Твоя страстотерпцы Твои поревновавшие, оставиша житейскую красоту, и быша ангелом сопричастницы. Тех мольбами подаждь душам нашим мир Христе Боже, и велию милость.

Слава, и ныне:

Со ангелы небесная, с человеки земная, во гласе радования Богородице вопием Ти: радуйся, врата небес ширшая. радуйся, едино земнородных спасение. радуйся Честная, радуйся Благодатная, рождающая Бога воплощенного.

По 2-м стихословии седален, глас 5-й:

Подобен: Собезначальное Слово:

Прежде Креста Твоего Щедре, и Востания, идущу Ти, слепый от рождения зываше тепле: Сыне Давидов помилуй, даждь ми свет очесем, да узрю Тя и аз: егоже зеницы помазав брением от плуновения Слове, тому свет светло дал еси.

Слава, и ныне: тойже.

Воскресение Христово: псалом 50.

И посем, канон праздника, со ирмосом на 8. И минеи на 4. Кондак и светилен праздника.

Песнь 1. глас 5-й:

Ирмос: Землю, на нюже не возсия, * ни виде солнце когда, * бездну, юже не виде нагу широта небесная, * Израиль пройде невлажно, * Господи, и ввел еси его в гору святыни Твоея, * хваляща и поюща победную песнь.

Распятие вольное восприим Спасе плотию, источил еси благословение, и жизнь мiрови Владыко, едiне Всеблагословенне, и всех Содетелю. Темже благословим Тя, поем и славим, поюще, воспевающе победную песнь.

В рове Тя преисподнейшем мертвa бывша Христе, положи благообразный Иосиф, и привали к дверем гроба камень, Долготерпеливе. Но воскресл еси славне, и мир совозставил еси поющий, воспевающий победную песнь.

Мира что приносите со слезами вы, глаголаше честным женам ангел явлейся? Христос воста: текше рцйте боговидцем учеником, рыдающим и плачущим, яко да взыграют и ликуют светло.

Чудеса преславная сотворяя, Избавитель исцели и слепa от рождения, брением помазав, и рек: иди умыйся в Силоаме, яко да познаеши Мя Бога по земли шествующа, плоть носяща, за милосердие щедрот.

Троицен: Едино Троиипостасное Существо почитающе вернии, прославим Отца, и Сына, и Духа праваго, Творца, и Господа, и Избавителя всех, единого несозданнаго со безплотными зывающе: Свят, Свят, Свят еси Царю.

Богородичен: Во утробу неискусобрачную Твою вселися Чистая Господь, за милосердие щедрот, спасти хотя человека истлевшаго козньми вражиими. Того убо моли, град сей спасти от всякаго пленения, и врагов нашествия.

И святаго Минея на 4.

Песнь 3.

Ирмос: Движимое сердце мое Господи, * волнами житейскими, * утверди, во пристанище тихое * наставляя яко Бог.

Колеблющихся сердца утвердил еси, землю всю поколебав Долготерпеливе, честным распятием Твоим еже претерпел еси плотию.

В новом гробе Тебе положи Щедре, Иосиф благообразный, воскресл же еси из мертвых тридневен новосотворивый нас.

Что яко мертвa ищите Господа? Воскресе, якоже рече ангел женам вещаше, блистая божественным зраком.

Слепа иногда от рождения, приступльша к Тебе исцелил еси Всещедре, славяща смотрение Твое и чудеса.

Троицен: Богу Отцу покланяемся Пребезначальному, и Сыну, и Божественному Духу, Тринесозданному Естеству, Троиипостасному, Единому Богу всех.

Богородичен: Из чрева девическа родила еси Бога воплощенна, Емуже молися Всесвятая Владычице, ущедрити нас.

И святаго Минея на 4.

Кондак, Икос, и Седален святого Минея.

Слава, и ныне: Таже седален, глас 8-й:

Подобен: Премудрости:

Всех Владыка и Творец преходя, обрете на пути слепа сядяща, плачуща и глаголюща: не видех в житии солнца сияюща, ниже луны света озаряющаго. Темже вопию Ти: рождейся от Девы, просвещей всяческая, просвети мя яко благоутробен, да зову припадая Тебе Владыко Христе Боже: прегрешений оставление даруй, за множество милости нам Человеколюбче.

Песнь 4.

Ирмос: Услышах Господи слух Твой, * и убояхся, * разумех смотрение Твое, * и прославих Тя, едине Человеколюбче.

Умерша мя древом, пожрен быв Спасе мой, жизнь сый оживил еси, за великую милость: сего ради Слове славлю Тя.

Учеником Господи, соводворяся преславно, сим глаголах еси: идите, проповедите всюду Мое Воскресение.

Уверяя Господи, востание Твое, еже из гроба, любящим Тя Христе, во дни многи соводворился еси, радость творя им.

Воочил еси Господи, слепа из утробы рожденна, рек: иди, умыйся, и прозри, Мое славя Божество.

Троицен: Единочестная, безначальная Троице, нераздельная Существом, раздельна Ипостасьми, спасай вся верно Тя страхом славящия.

Богородичен: Рождество Твое Чистая еже паче естества славословим блажаще верно Тебе Пренепорочная, яко Бога всех Родительницу.

И святого Минея на 4.

Песнь 5.

Ирмос: Окаянную душу мою, * ношебoryщуюся со тмою страстей, * предварив ущедри, * и возсияй мысленное солнце, * днесветлыя звезды во мне, * во еже разделить ночь от света.

Вознеслся еси на Древо Щедре, и совознесл еси вся человеки, и борителя змия умертвил еси, и оживил еси создание рук Твоих, яко един Бог всех.

Положился еси во гробе волею Царю Безсмертне, и царствия адова вся истощил еси, мертвыя Воскресением Твоим воздвигнув.

Чудеса велия соделовающаго Слове на земли, людие убиша Тя беззаконнии: но Сам Господи, един всесилен сый, якоже предрекл еси, из мертвых воскресл еси Христе.

Очи отверзл невидевшаго свет чувственный, души просветил еси зеницы, и славити сотворил еси сего, познавша Тя Творца, за благоутробие явившася человека.

Троицен: Троицу во Единице, и в Троице Единицу вернии славословим вси, Отца и Сына, и Духа Праваго, единого Бога, Содетеля всех воистинну.

Богородичен: Како родила еси богоблагодатная Дево Мати Чистая, не познавши искуса мужеска? Како питаеши Питающего всю тварь? Якоже един вестъ Сам, всех Творец и Бог.

И святого Минея на 4.

Песнь 6.

Ирмос: Якоже пророка от зверя избавил еси Господи, * и мене из глубины несодержимых страстей возведи, * молюся, да приложу прирети ми * ко храму святому Твоему.

Распныйся с разбойники Владыко, избавил еси от разбойник лукавых, душегубных страстей, Человеколюбче Господи, вся поющыя Твое распятие, и востание согласно.

Положиша без дыхания Тебе мертва, Христе, во гробе, всем мертвым вдыхающа жизнь: воскресл же еси Господи, вся истощивый Слове гробы, Божественною Твоею силою.

По востании Христе, другом глагола еси: сидите убо во Иерусалиме, дондеже облечетеся силою свыше непобедимою, и известною помощию.

Брение сотвори, очи слепаго от рождения помазал еси, и даровал еси ему прозрети, поюще Твою Слове неизреченную силу, еюже спас еси мир.

Троицен: Триипостасная Единице, Отче нерожденне, Сыне рожденне, и Душе исходне, Трисвятый Господи, едино Существо и сила, спасай вся люди Твоя.

Богородичен: Величия Твоя, Чистая, кто исповестъ? Бога бо плотию родила еси преестественно, мир Тобою избавляющего, Дево Всенепорочная, от всякаго греха.

И святого Минея на 4.

Кондак, глас 4-й: Подобен: Явился еси днесь:

Душевными очима ослеплен, к Тебе Христе прихожду, якоже слепый от рождения, покаянием зову Ти: Ты сущих во тме свет пресветлый.

Икос: Струю ми даруй Христе, премудрости неизреченныя, и разума горняго, Свете сущих во тме, и прельщаемых Наставниче, да возмогу чудеса Твоя поведати окаанный, яже Божественная книга научи Евангелиа мира, сиестъ, слепаго чудотворение: яко от рождения слеп сый, очи чувственныя приемлет и душевныя, верую взывая: Ты сущих во тме свет пресветлый.

Песнь 7.

Ирмос: Огня гасилище отроков молитва, * орошающая печь проповедница чудесе, * не опаляющи, ниже сожигающи, * песнословцы Бога отец наших.

Воздвижену Тебе на Древо Спасе, погасе солнце, земля волнуяшися, колебашися тварь вся, и от гроб мертвии востаяху.

Воставшу ти из мертвых Царю, души совозсташа тамо спящия, славящия силу Твою, еюже смертныя узы разрешишася.

Рано миропомазати Тя женский прииде лик, уведевше же Господи воставша Тя, радовахуся со священными ученики: имиже подаждь нам очищение зол.

Брением помазал еси очи слепаго, и сему повелел еси к Силоаму ити, омывся же прозре, песнословя Тя Христе, Царю всех.

Троицен: Отца безначальна, собезначальна же Сына, и Духа Пресвятаго песнословим: Свят, Свят, Свят еси Боже, Царю всех.

Богородичен: По рождестве Дева явилася еси Чистая, Бога бо родила еси, обновившаго естества Пречистая силою Своею: Егоже моли спастися всем нам.

И святаго Минея на 4.

Песнь 8.

Ирмос: Ангелов сонм, человеков собор, * Царя и Зиждителя всех, * священницы пойте, благословите левити, * людие превозносите во вся веки.

Ангельстии чинове на Кресте Тя видевше висима Христе Всецарю, и тварь всю изменяюща страхом, ужасошася поюще Твое человеколюбие.

Ад доле Тебе видел стеньяше, и подаваше скоро мертвыя от века тамо хранимыя, Христе, песнословящия Твое человеколюбие.

Сотворяя чудеса Христе изрядная, волею воздвиген был еси на Крест, и с мертвыми совокупился еси умертвивый ада, и вся мужеством отрешил еси узники.

Слепаго воочил еси к Тебе приступивша Христе, сему повелевый в Силоамову купель ити, омытися и прозрети, и Бога Тя проповедати, плотию явившагося во спасение мира.

Троицен: Троице нераздельная, Единице неслиянная, Боже всяческих и Зиждителю всех, песнословящия и верно покланяющияся державе Твоей, от всяких искушений спасай.

Богородичен: Дево Пречистая, богоблагодатная, Твоего моли Сына всегда, да не посрамит мя в день осуждения, но сочтет избранным овцам.

И святаго Минея на 4.

Честнейшую стихословится:

Песнь 9.

Ирмос: Яко сотвори Тебе величия Сильный, * Деву явль Тя чисту по рождестве, * яко рождшую без семене Своего Творца: * тем Тя Богородице величаем.

На Древе крестнем пригвоздился еси Христе Боже, и вся победил еси вражия сопротивная начала, и первую клятву потребил еси Спасе: темже Тя по долгу величаем.

Яко виде Тя Слове, ад доле с душею, воздохну, и вся мертвыя страхом отрещи, познавшыя державу власти Твоя: темже Тя по долгу величаем.

Знамения сотворяюща, и чудеса страшная, собор еврейский зря, завистию уби пленившаго ад Воскресением Своим, и всех яко силен возставающаго.

Востал еси, якоже рекл еси, Животодавче из мертвых, и явился еси святым учеником по востании, знамения сотворивый, и воочивый слепыя: с ними же Тя во веки величаем.

Троицен: Свет Отца чту, Свет славлю и Сына, Свет воспеваю Духа Праваго, един Свет нераздельный, в триех Лицех разумеваемый, Бога Царя всея твари.

Богородичен: Явившися пространнейшая небес Дево Чистая, вместила еси плотию Бога неописаннаго, и родила еси всех Избавление, верою несумненною воспевающих Тя.

И святаго Минея на 4.

Екзапостилларий, слепаго:

Умныя мои очи ослепленные, Господи, от мрачнаго греха, Ты просвети, вложив Щедре смирение, и покаяния омой слезами.

Слава, и ныне: Подобен: Жены услышите:

Мимойдый Спас наш, обрете слепа без очию, плюнув на землю и сотворив брение, помаза его, к Силоаму посла ити и умыться. Он же умывся, прииде видя свет Твой Христе мой.

На хвалитех поставим стихи 4. И поем стихиры осмогласника, глас 5-й:

Господи, запечатану гробу от беззаконников, прошел еси из гроба, якоже родился еси от Богородицы: не уразумеша, како воплотился еси, безплотнии Твои ангели: не чувствоваша, когда воскресл еси, стрегущи Тя воины. Обоя бо запечатлестася испытующым, явившася же чудеса кланяющимся верою таинству: еже воспевающим, воздаждь нам радость и велию милость. **[Дважды.]**

Увы мне, кому уподобихся аз? неплодней смоковнице, и боюся проклятия с посечением. Но Небесный Делателю Христе Боже, оляденевшую мою душу плодоносну покажи, и яко блуднаго сына приими мя, и помилуй мя.

Мученичен: Благословено воинство Царя Небеснаго: аще бо и земнородни быша страстотерпцы, но ангельское достоинство потщашася достигнути: тела презревше, и страдания безплотных сподобышеся чести. Молитвами тех Господи, низпосли нам велию милость.

Слава, и ныне: глас 2-й:

Все житие слепый ноц помышляя, возопи к Тебе: Господи отверзи ми зеницы, Сыне Давидов, Спасе наш, да со всеми и аз воспою Твою силу.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры праздника, глас 5-й:

Подобен: Преподобне Отче:

Ослепление явися слепый негли видящим, омрачая и разумы и души и ум, зрящим его безгодное прозрение, и пригласивше вопрошаху с лютою: како ныне зриши яко един от свет видящих, слеп сый от рождения, и приседая стезям и просия? Темже показа свет Подающего, и Создавшего светила в мире. От нихже проповедается Сын Божий Пребезначальный, в последняя из Девы Человек явлейся за милосердие, от Божественнаго Духа.

Стих: Призри на мя, и помилуй мя.

Якоже бремя и земное тяжконосие зряшеся, в мире ходя слепый, и по стогнам ноги сокрушая, негли якоже зрением жезлом богатея. Темже прибегает к Светодателю, от Негоже приемлет свет зрети, и очима своими видети Творца, по подобию Твоему, и по образу создавшего естество человеческое от земли первее, и ныне перстию и плуновением Просветившаго его зеницы, и Давшаго человеколюбно зрети солнце.

Стих: Стопы моя направи по словеси Твоему:

Сообразна узре человеческому образу Слова Отча, свет виде слепый, от негоже светоносное и днечальное виде солнце, якоже и прочии человецы радуя зрению новолепнейшему, имже украсяшеся право идый, и безтрудне проходя стези, и просветившаго Сына Божия познавая, вочеловечшася крайняго ради благоутробия, и еже бе пребывша Бога, Человека бывша, и приемша еже не бе, неслиянное же соблюдающа сих соединение.

Слава, и ныне: глас 5-й:

Господи, мимоходя путем, обрел еси человека слепа от рождения, и удивлени бывше ученицы, вопрошаху Тя глаголюще: Учителю, кто согреш, сей ли, или родители его, да слеп родися? Ты же Спасе мой возопил еси к ним: ни сей согреш, ни родители его, но да явятся дела Божия на нем. Мне подобает делати дела Пославшаго Мя, яже никтоже может делати. И сия рек, плюнув долу, и брение сотвори, помазал еси очи его, рек к нему: иди умыйся в Силоамстей купели. Он же умывся здрав бысть, и вопияше к Тебе: верую Господи, и поклонися Тебе. Темже вопием и мы: помилуй нас.

Таже, Благо есть исповедатися Господеви

Трисвятое. И по Отче наш:

Тропарь воскресен, глас 5-й:

Собезначальное Слово Отцу и Духови, от Девы Рождающееся на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим.

[Слава, и ныне, Богородичен, глас 5-й]

Таже ектения: Помилуй нас Боже: Час 1. И отпуст.

НА ЛИТУРГИИ

Блаженна, от канона слепаго, песнь 1, на 6.

Умерша мя древом, пожрен быв Спасе мой, жизнь сый оживил еси, за великую милость: сего ради Слове славлю Тя.

Учеником Господи, соводворяся преславно, сим глаголаа еси: идите, проповедите всюду Мое Воскресение.

Уверяя Господи, востание Твое, еже из гроба, любящим Тя Христе, во дни многи соводворился еси, радость творя им.

Воочил еси Господи, слепа из утробы рожденна, рек: иди, умыйся, и прозри, Мое славя Божество.

Слава, Троицен: Единочестная, безначальная Троице, нераздельная Существом, раздельна Ипостасьми, спасай вся верно Тя страхом славящия.

И ныне: Богородичен: Рождество Твое Чистая еже паче естества славословим блажаще верно Тебе Пренепорочная, яко Бога всех Родительницу.

По входе тропарь воскресен. глас 5-й:

Собезначальное Слово Отцу и Духови, от Девы Рождающееся на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим.

И храма святаго: И тропарь святаго, аще есть. Аще ли будет и другаго святаго тропарь, то рцы его: таже кондак храма. Слава: святаго. Аще ли будет и другаго святаго кондак, такожде рцы его.

И ныне: Кондак слепаго, глас 4-й:

Душевными очима ослеплен, к Тебе Христе прихожду, якоже слепый от рождения, покаянием зову Ти: Ты суших во тме свет пресветлый.

Прокимен, глас 8-й: Помолитесь и воздадите Господеви Богу нашему.

Стих: Ведом во Иудеи Бог, во Израили велие имя Его.

Апостол в Деяниях, зачало 39.

Во дни оны, Препедаша же Амфиполь и Аполлонію, внидоша въ Солунь, и дѣже бѣ сонмище Иудейское. По обычаю же своему Павелъ вниде къ нимъ и по субботы три стязашеся съ ними от Писаній, сказуя и предлагая имъ, яко Христу подобаше пострадати и воскреснути от мертвыхъ, и яко Сей Иисусъ, Егоже азъ проповѣдую вамъ, есть Христосъ. И нѣцыи от нихъ вѣроваша и приложишася къ Павлу и Силѣ, от честивыхъ Еллинъ множество много и от женъ благородныхъ не мало. Возревновавше же непокорѣиися Иудее и приѣмше крамолники нѣкія мужы злыя, и собравше народъ, молваху по граду: нашедше же на домъ Иассоновъ, искаху ихъ извести къ народу. Не обрѣтше же ихъ,

влечаху Иассона и нѣкія от братій ко градоначалникомъ, вопіюще, яко, иже развратиша вселенную, сїи и здѣ придоша, ихже прїятъ Иассонъ: и сїи вси противно велѣніемъ кесаревымъ творять, царя глаголюще иного быти, Иисуса. Смятоша же народъ и градоначалники слышащія сія: вземше же довольно от Иассона и от прочихъ, отпустиша ихъ. Братія же абіе въ нощи отслаша Павла и Силу въ Берію: иже пришедша, идоша въ соборъ Иудейскій. Сїи же бяху благороднѣйши живущихъ въ Солуни, иже прїяша слово со всѣмъ усердіемъ, по вся дни разсуждающе Писанія, аще суть сія тако. Мнози убо от нихъ вѣроваша, и от Еллинскихъ женъ благообразныхъ и мужей не мало. И яко увѣдаша иже от Солуны Иудее, яко и въ Беріи проповѣдася от Павла слово Божіе, придоша и тамо движуще и смущающе народы. Абіе же тогда братія отпустиша Павла ити на поморіе: остаа же Сила и Тимоѳей тамо. Провождаящїи же Павла ведоша его даже до Аѳинъ, и прїемше заповѣдь къ Силѣ и Тимоѳею, да яко скорѣе прїидутъ къ нему, изыдоша.

Аллилуиа, глас 8-й: Призри на мя, и помилуй мя.

Стих: Стопы моя направи по словеси Твоему.

Евангеліе Иоанна, зачало 40. [Ин. 11, 47–57.]

Во время оно, Собраша убо архіерее и фарисее сонмъ, и глаголаху: что сотворимъ? Яко Человѣкъ Сей многа знаменія творить: аще оставимъ Его тако, вси увѣрують въ Него: и прїидутъ Римляне, и возмутъ мѣсто и языкъ нашъ. Единъ же нѣкто от нихъ Каіафа, архіерей сый лѣту тому, рече имъ: вы не вѣстаете, ни помышляете, яко уне есть намъ, да единъ человекъ умретъ за люди, а не весь языкъ погибнетъ. Сего же о себѣ не рече: но архіерей сый лѣту тому, прорече, яко хотяше Иисусъ умерети за люди, и не токмо за люди, но да и чада Божія расточеная соберетъ во едино. От того убо дне совѣщааша, да убіють Его. Иисусъ же ктому не явѣ хождаше во Иудеехъ, но иде оттуду во страну близъ пустыни, во Ефремъ нарицаемый градъ, и ту хождаше со ученики Своими. Бѣ же близъ Пасха Иудейска, и взыдоша мнози во Иерусалимъ от странъ прежде Пасхи, да очистятся. Искаху убо Иисуса, и глаголаху къ себѣ, въ церкви стояще: что мнится вамъ, яко не имать ли прїити въ праздникъ? Даша же архіерее и фарисее заповѣдь, да аще кто оцутитъ [Его], гдѣ будетъ, повѣсть, яко да имутъ Его.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувший: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастен: Тело Христово примите, источника безсмертнаго вкусите.